



Firii Guyyaa Aakhiraatti Amanuu

Description

Ilmaan namaa yommuu jirenya tana keessa jiraatan gaafinakkana jedhuu yeroo hundaa sammuu isaanii quuqa. “Eessa deemaa jiraa? Xumurri ykn gahuumsi kiyya eessaa? Du’ee achumaan nan badaa?” Kuni gaafi guddaa deebii barbaadudha. Namni gaafi kanaaf deebii argate, jirenya keessatti tasgabbiin jiraata. Sababni isaas, gahuumsa itti deemu waan beekuf. Kanaafi, namoota Rabbii fi Guyyaa Aakhiraatti amanan tasgabbaa’oo fi abdii kan hin kunne ta’anii argina. Balaa ykn gadda cimaa keessa yommuu ta’an, wanta abdatan tokko qabu. Yommuu hojji gaggaarii hojjatan wanta kajeelan tokko qabu. Yommuu nafseen isaanii gara baditti isaan kakaastu, wanta tokko sodaachun of qabu. Kuni hundii jirenya keessatti aannan tasgabbii akka dhugan isaan taasisa.

Faallaa kanaa, namoota Rabbii fi Guyyaa Aakhiraatti hin amanne yommuu balaan isaan muudatu, wanta abdatan waan hin qabneef garmalee dhiphatu. Inumaa gara of galaafachu deemu. Ammas, yommuu hojji gaggaarii hojjatan, wanta addunya tana keessatti argan malee wanta biraa waan hin abdaneef gammachuun hojji isaanii irraa argatan baay’ee xiqqaadha. Dabalataan, yommuu nafseen isaanii gara baditti isaan kakaastu, Aakhiratti ni adabamna jedhanii waan hin yaannef nafsee ofii duuka bu’uun hallayya badiitti taru. Kuni jirenya isaanii keessatti hadhaa gaddaa fi dhiphinnaa akka dhandhaman isaan taasisa.

Guyyaa Aakhiraatti amanuuun dhugumatti faayda hangana hin jedhamne qaba. Firii Guyyaa Aakhiraatti amanuu irraa argamu keessaa mee muraasa haa ilaallu:

1-Qajeelinnaa fi milkaa’inna argachuu

Namni akkuma bisaaniif garmalee dheebotu qajeelinnaa fi milkaa’innaafis garmalee dheebota. Jaallinnaa keessa raata’uun wanti inni argatu hin jiru. Qajeelinni guddaan namni jirenya keessatti argatu, eenu akka isa uumee beeku; Maaliif addunyaa tana keessa akka jiraatu beeku fi eessa deemaa akka jiru itti xinxalluun iddo gahuumsa isaatiif galaa gahaa qopheefachuudha. Kanaafi, Rabiin subhaanahu wa ta’ala baniinsa suuratul Baqara keessatti warroota qajeelanii fi milkaa’an ni dubbata:

ذَلِكَ الْكِتَبُ لَا رَيْبٌ فِيهِ هُدًى لِّلْمُتَّقِينَ ﴿١﴾ الَّذِينَ يُؤْمِنُونَ بِالْغَيْبِ وَيُقِيمُونَ مِمَّا رَزَقَنَاهُمْ يُنفِقُونَ ﴿٢﴾ وَالَّذِينَ يُؤْمِنُونَ بِمَا أُنْزِلَ إِلَيْكَ وَمَا أُنْزِلَ مِنْ قَبْلِكَ هُمْ يُوقِنُونَ ﴿٣﴾ أُولَئِكَ عَلَى هُدًى مِّنْ رَّبِّهِمْ وَأُولَئِكَ هُمُ الْمُفْلِحُونَ ﴿٤﴾

“Alif Laam Miim. Kuni Kitaaba (Qur'aana) mamiin isa keessa hin jirreedha; warra Rabbiin sodaataniif qajeelfama. Isaan warra Gheeybitti amanan, kan salaata dhaabanii fi waan Nuti isaaniif arjoomee irraa kennaniidha. Ammas, isaan warra waan gara keetti buufamee fi waan si dura buufametti amananii fi Aakhiraatti [shakkii tokko malee] dhugaan amananiidha. Warri suni qajeelfama Rabbii isaanii irraa ta'e irra jiru. Ammas, warri suni isaantu milkaa'odha.” Suuratu Al-Baqara 2:1-5

Kana jechuun Qur'aanni kuni shakkiin homaatu keessa hin jiru. Wanti inni of keessaa qabu hundi haqa, Rabbiin irraa bu'uun isaas shakkii hin qabu. “**Buufamuun Kitaabichaa (Qur'aanaa) Gooftaa alamaa irraa ta'uun shakkiin isa keessa hin jiru.**” Suuratu As-Sajdah 32:2

Qur'aanni kuni qajeelfama kan ta'uuf warra Rabbiin sodaataniif. Warra Rabbiin sodaatan (muttaqiiin) jechuun warra waan gaarii hojjachuu fi waan badaa dhiisun adabbi fi dallansuu Isaa irraa of eeganiidha. Qur'aanni kuni issaanif sobaa fi dhugaa, jallinnaa fi qajeelinna, wanta fokkuu fi miidhagaa, badaa fi gaarii addaan issaanif baasa. Warri Rabbiin sodaataniis, soba, jallinnaa fi wanta fokkuu dhiisun dhugaa, qajeelinna fi wanta gaarii hordofu. Warri kuni warra gheeybitti amanuudha. Gheeybi jechuun wanta ijaan hin mul'annee fi sammuun nama bira gahuu hin dandeenyedha. Ilmi namaa addunyaa tana keessatti Rabbii olta'aa ijaan arguu hin danda'u. Garuu wantoonni uumaman hundii Uuman akka jiru ni akeeku. Akkasumas, kitaabban Isarraa bu'an sifaata (amaloota) Isaa ni himu. Kanaafu, Rabbitti ni amanu. Ammas, Jannata, Jahannam, fi wanta Aakhiratti adeemsifamu biroo odeefannoo karaa Ergamtoota Rabbiitiin isaan gahee irratti hundaa'un ni amanu.

Geeybitti amanuun wanta mu'minaa fi kaafiraa addaan baasudha. Dhimmichi wanta ijaan mul'atutti amanuu osoo hin ta'in wanta ijaan hin mul'annetti amanuudha. Ammas, warrooni Rabbiin sodaatan salaata ni dhaabu. Kana jechuun waqtii, ulaagaa fi rogoota salaataa eegun sirnaan salaatu. Yeroo salaatan qalbi guutuu salaata irra godhu. Ammas, wanta Rabbiin (Azza wa jalla) issaanif kenne irraa ni kenuu. Kanneen akka zakaa, sadaqaa, maatii ofii irratti baasi barbaachisu baasu, wanta gaariif qabeenya issaanii irraa hanga danda'an kennuudha.

Warrooni Rabbiin sodaatan wanta gara Nabii Muhammad (SAW) bu'etti ni amanu. Kana jechuun Qur'aanaa fi sunnaatti ni amanu, ni hordofu. Akkasumas, kitaabban Nabiyyi (SAW) dura bu'anittis ni amanu. Aakhiratti shakkii tokko malee dhugaan amanu. Aakhiraan akka jirtu dhugaan beekun, wanta issaan irraa eeggamu ni hojjatu. Wanta badaa ni dhiisu. Warri kuni qajeelfama Rabbiin irraa ta'e irra jiru. Jireenya keessatti hin dhama'an, dukkanni issaanitti hin bu'u. Namni kan dhama'uu fi dukkanni itti bu'uuf qajeelfama yommuu dhabuudha. Warri kuni warra milkaa'aniidha. Milkaa'inka jechuun wanta


badaa jibban irraa nagaha bahuu fi wanta gaarii jaallatan argachuudha.

Amaloota jahan armaan olii warri qaban warra qajeelfamu fi milkaa'udha. Amalooni jahan kunniinis: (1)Rabbiin sodaachu, (2) Gheeybitti amanuu, (3) salaata sirnaan salaatu, (4) qabeenya isaanii irraa baasi dirqama fi jaallatamaa ta'e baasu, (5) kitaabban Rabbiin buusetti amanuu fi (6)Aakhiratti shakkii tokko malee dhugaan amanudha.

Dhugumatti namoonni kunniin Maaliif akka jiraatan beekun waan gaarii ni hojjatan, waan badaa ni dhiisan. Eessa akka deeman beekun Aakhiratti dhugaan ni amanan. Gahuumsi nama hundaa Aakhiraan waan ta'eef. Kanaafu, isaan qajeelinna milkaa'innatti nama baasu irra jiru jechuudha.

2-Hojii gaggaarii hojjachuu

Guyyaan wanta hojjateef itti qoratamuu fi mindaa itti argatu akka jiru namni beeku, hojii gaggaarii hojjachuuf carraaqqa. Jannani gara hundaan miidhagde warra amananii fi hojii gaarii hojjataniif akka qophoofta namni amanu, dhugumatti hojii gaarii irratti garmalee jabaata. Jannata samii nu olii torbaffaa keessa jirtu yommuu itti yaadu, addunyaan tuni isa biratti xiqqoo akka taatetti ilaala. Qur'aana keessatti;



“Yeroo achi (Jannata) keessa ilaaltes Qananii fi Mootummaa Guddaa ni argita.”(suuratu Al-Insaan 76:20)

Jannani gahuumsa warroota amananii fi hojii gaggaarii hojjataniiti.

﴿إِنَّ اللَّهَ يُدْخِلُ الَّذِينَ ءَامَنُوا وَعَمِلُوا الصَّلِحَاتِ جَنَّتٍ تَجْرِي مِنْ تَحْتِهَا أَلْأَنْهَرُ يُحَلَّوْنَ فِيهَا مِنْ أَسَاوِرَ مِنْ ذَهَبٍ وَلُؤْلُؤًا وَلِبَاسُهُمْ فِيهَا حَرِيرٌ﴾

“Dhugumatti Rabbiin isaan amananii fi hojii gaggaarii hojjatan Jannata laggeen jala yaa'an isaan seensisa. Ishii (Jannata) keessatti gumeewwan warqee fi lu'lu'a irraa ta'aniin faayamu. Uffanni isaanii ishii keessatti hariira.” Suuratu Al-Hajj 22:23

Gumeewwan jechuun faaya akka geengoo harka irratti godhatamuudha. Jechi, “lu'lu'a” jedhu afaan Oromootin hangas mara beekkamaa miti. Ingiliffaan Pearls, Amaariffaan immoo “Lul” jedhama. Galmee Jechootaa “Hirkoo” jedhamu irratti, jecha pearl jedhu “Ardoosomboo” jechuun hiika. Akkaaf akka marattu, “lu'lu'a” wanta akka callee adii fakkaatu beelladota bisaan keessa jiraatan keessaa baafamuudha. Baay'ee bareedaa waan ta'eef yeroo baay'ee faayaf itti fayyadaman.

Namni ganda tanaaf hawwuu jirenyaa ofii bakkuma argetti hin balleessu. Yeroo isaa guutuu xiqlaatus guddatus hojii badhaasa guddaa kana namaaf argamsiisu hojjata. Kuni immoo jirenyaa addunyaa tana keessattu tasgabbii fi gammachuu isaaf ta'a. Qalbiin namaa kan tasgabbootu yommuu hojii badaa dhiisanii fi hojii gaarii hojjataniidha.

3- Hojii fokkuu fi badaa irraa fagaachu

Namni Aakhiratti amanuu nama hojii fokkuu fi badaa hojjateef Jahannam akka jirtu ni beeka. "Hojii fokkuu yoo hojjadhe, Jahannamii adabbiin ishii cimaa ta'e ni seena." Jechuun sodaata. Kuni immoo hojii fokkuu irraa akka dheessu isa gargaara. Qur'aana keessatti:

فَالَّذِينَ كَفَرُوا قُطِعَتْ لَهُمْ ثِيَابٌ مِّنْ نَّارٍ يُصَبَّ مِنْ فَوْقِ رُءُوسِهِمْ أَلْحَمِيمُ
ۚ سَهْرٌ بِهِ مَا فِي بُطُونِهِمْ وَأَجْلُودُ^{۱۶} وَلَهُمْ مَقَامٌ حَدِيدٌ^{۱۷} كُلُّمَا أَرَادُوا أَنْ
رُجُوا مِنْهَا مِنْ غَمٍ أُعِيدُوا فِيهَا وَذُوقُوا عَذَابَ الْخَرِيقِ^{۱۸}

"Isaan kafaran uffata ibidda irraa ta'etu isaaniif kutama; mataa isaanii gubbaas bishaan danfaatu itti naqama. Isa sanaan (bishaan danfaan) wanti garaa isaanii keessa jiruu fi gogaan [isaanii] itti baqfama. Ammas, jirma sibiilaa irraa ta'etu isaaniif jira. Dhawaatuma isaan yaaddo irraa kan ka'e ishii keessaa bahuu fedhaniin ishii keessatti gadi deebifamu. "Adaba gubaa dhandhamaa!" [jedhamu]." Suuratu Al-Hajj 22:19-22

Warra Rabbitti amanuu didanii fi waan bira Isa waliin gabbaran (waaqefatan) ibiddi isaaniif uffata ta'a. Gara hundan isaan marsa. Mataa gubbaa isaaniitii bishaan garmalee danfaan itti naqama. Sababa bishaan danfaa kanaan wanti garaa isaanii keessa jiru ni baqfama. Akkasumas, gogaan isaanii ni baqfama. Jirma sibiilaa (madooshaa) kan Malaykoonni isaan itti rukutantu isaaniif jira. Garmalee yaaddawuu fi dhiphachuu irraa kan ka'e akkuma ibidda keessaa bahuuf tattaafatanii gara ibiddaatti gadi deebifamu. "Adabbi garmalee nama gubu dhandhamaa" jedhamu. Kuni hundi sababa isaan yakka guddaa hojjataniif. Rabbii olta'a isaan soorutti kafaranii yommuu dachii keessatti badii babal'isan adabbiin isaaniis kana ta'e. Rabbiin isaan hin miine, ofumaa of miidhanii malee. Rabbiin kanarrraa nu haa tiiksu.

Dhugumatti, namni kana beekun ifaa fi dhoksatti wanta badaa fi fokkuu hojjachuu irraa ni fagaata. Badii irraa fagaachun immoo jirenyaa keessatti tasgabbii fi badhaadhinna akka argatu isa taasisa. Wanta fokkuu fi badaa hojjachuu caalaa wanti jirenyaa namatti dhphisu ni jiraa?

4- Wanta dhabaniif jabeenyaa fi obsa argachuu

Namni Aakhiratti amanuu addunyaa irraa yoo waa isa jala darban ykn balaan itti bu'e, Aakhiratti wanta san caalu abdata. Wanta dhabeef ykn isa jalaa badeef yoo obse, Aakhiratti mindaa guddaa argata. Akkasumas, yommuu balaa fi rakkoon isatti bu'u, rakkoon Aakhirah kana caalaa guddaa akka ta'e

ilaalun rakkoo addunyaa akka salphaatti ilaala. Qur'aana keessatti namoonni gaggaarii akkana akka jedhanii fi mindaa isaanii Rabbiin (subhaanahu wa ta'aalaa) ni hima:

إِنَّا نَخَافُ مِنْ رَبِّنَا يَوْمًا عَبُوسًا قَمَطِرِيًّا ﴿١٠﴾ فَوَقَلُّهُمُ اللَّهُ شَرَّ ذَلِكَ
يَوْمٌ وَلَقَلُّهُمْ نَضْرَةً وَسُرُورًا ﴿١١﴾ وَجَزَّ لَهُمْ بِمَا صَبَرُوا جَنَّةً وَحَرِيرًا ﴿١٢﴾

“Dhugumatti Gooftaa keenya irraa Guyyaa fuula guuraa hammaataa ta’e sodaanna.” Rabbiinis hamtuu gaafasii irraa isaan tiiksee ifaa fi gammachuu isaaniif kenna. Sababa isaan obsaniif Jannataa fi hariira isaaniif galata galcha.” Suuratu Al-Insaan 76:10-12

“Guyyaa fuula guuraa hammaataa ta’e sodaanna” kana jechuun Guyyaa garmalee hammaataa fi cimaa fuula akka guuranii fi suntursan nama taasisu sodaanna. Rabbiinis hamtuu fi adabbii guyyaa sanii irraa isaan tiksun fuula isaanitiif ifa, keessa isaanitiif gammachuu kennaaf. Waan obsaa turaniif Jannata fi uffata hariiraa isaan badhaasa.

Kanaafu, namni Aakhiratti amanu Guyyaa garmalee hammaataa ta’ee fi Jannata qananiin guuttamte yommuu yaadatu, rakkoon addunyaa tanaa isaaf salphata.

Guduunfaa

?Namni jirenyaa keessatti **“Erga du’ee achumaan badee hafa moo addunyaa biraatu jira?”** jechuun gaafi guddaa of gaafata.

? Guyyaan Aakhirah guyyaa xumuraa namni wanta hojjataa tureef itti qoratamuu fi itti mindeefamuudha. Kanaafu, Aakhiratti amanuun gaafi armaan olitiif deebii gahaa kenna.

?Namni Aakhiratti amanu, gahuumsi ilma namaa eessa akka ta’e waan beekuf jirenyaa keessatti hin dhama’u. Eessa akka deemaa jiru siritti beeka.

?Hojii gaggaarii yommuu hojjattu Aakhiratti mindaa guddaa abdachuun hojii san qulqullinnaa fi si’aa’innaan hojjachuuf carraaqa.

?Nafseen isaa hojii badatti yommuu kakaastu, adabbii cimaa Aakhiratti isa qunnamu sodaachun of qaba.

?Yommuu musiiban (balaan) isatti bu’u, rakkoo Guyyaa Qiyaamaa kana caalaa guddaa akka ta’e yaadun obsa. Kuni hundi jirenyaa keessatti aannan tasgabbi akka dhugu isa taasisa.

?Namni Aakhiratti hin amannee immoo mindaa hojii gaarii maallaqaa fi beekkamti malee wanta biraawaan hin abdanneef hawwii isaa addunyama tana qofa irratti gabaabsa. Beekkamtii fi maallaqa yoo dhabe, keessi isaa ni gubata.

?Wanta badatti nafseen isaa yommuu isa kakaastu of qabuun itti ulfaata. Sababni isaas, adabbii Aakhiraatti waan hin amanneef.

?Yommuu musiiban isatti bu’uu wanta Aakhiratti abdatu waan hin qabneef dhiphinnaa fi yaaddo cimaa keessa seena.

?Dhugumatti Aakhiratti amanuun jirenyaa tasgabbi fi milkaa’innaa akka gaggeessan nama taasisa. Wa Aakhiru daaw’anaa anilhamdulillahi Rabbil aalamiin

Kitaabban Wabii:

Shariih Usuuli salaasa Fuula 105 Ibn Useymiin

Taysirul Kariimil Rahmaani fii tafsiiri Kalaamil Mannaani

—Abdurahmaan Naasir Sa'dii

Tafsiira Qurxubii

<https://islamqa.info/en/answers/215011/where-is-paradise-and-where-is-hell>

Date Created

December 29, 2018

Author

admin